

INFORMASIE-TEGNOLOGIE

INFORMATION TECHNOLOGY

ZOTERO: STAP VIR STAP

In 'n vorige [bloginskrywing](#) het ons jou vertel van Zotero, 'n kragtige verwysingsmiddel. Dié keer verduidelik ons hoe dit werk.

VERSAMELING VAN BRONNE

Daar's 'n [cool skermopname \(screencast\)](#) wat al die aspekte hieronder illustreer, sowel as 'n [baie goeie gids](#).

Zotero se **eerste 'wenner' eienskap** is die feit dat dit vir jou makliker en vinniger maak om die **inligting oor jou bronne akkuraat te versamel**. In die meeste gevalle kan jy **al die inligting** wat vir 'n aanhaling nodig is (bv. titel, datum, uitgewer en plek – in die geval van 'n boek) **met 'n enkele klik "gryp"** terwyl jy na die spesifieke item op jou verkose navorsings/biblioteekwebwerf kyk (bv. Google Scholar, JSTOR, EBSCOHost). Daar is vier maniere om bronne te versamel:

1. **Gebruik die ikoon in die adreslyn.** Op die meeste webwerwe dal Zotero 'n **ikoon** aan die **regterkant** van die **boonste adreslyn** byvoeg. Wanneer daar op hierdie ikoon geklik word, sal Zotero outomaties die metadata van die item waarna jy tans kyk, gryp (bv. 'n boek op Google Books, 'n wetenskaplike artikel op JSTOR, ens.) en 'n nuwe item in jou biblioteek skep.
2. **Gebruik jou navorsings/biblioteekwebwerf se "aflaai" (Export) funksie.** Die meeste navorsingswebwerwe sal 'n "aflaai" skakel êrens op die blad hê. Zotero sal sonder probleme 'n nuwe item in jou biblioteek skep wanneer jy **op daardie skakel klik**. Dit is veral nuttig wanneer jy na **soekresultate** op 'n webwerf soos Google Scholar kyk, omdat jy **baie bronne baie vinnig sal kan byvoeg** (m.a.w. wanneer jy alles wat interessant lyk, saam groepeer om later daarna te kyk).
3. **Sleutel 'n boek se ISBN in.** Indien jy met **gedrukte boeke** werk, sal jy daaraan gewoon wees om na die boek se voorste bladsye te blaai en die fyn druk te probeer lees vir die besonderhede soos die uitgewer, en die plek en jaar van publikasie. In hierdie geval is Zotero se toorkuns veral skouspelagtig. **Klik eenvoudig op die 'towerstaffie' knoppie** in Zotero, **sleutel die boek se ISBN in** en **druk die doensleutel ENTER**. Amper **onmiddellik** sal Zotero 'n aantal wêreldwye ISBN-dienste kontak, die korrekte metadata van die boek kry en 'n nuwe item in jou biblioteek skep.
4. **'n Nuwe item met die hand skep.** In die seldsame geval dat nie een van bogenoemde maniere beskikbaar is nie, kan jy 'n nuwe item skep en die besonderhede met die hand invoeg (d.w.s. op die sleutelbord).

AANHALING VAN BRONNE EN DIE SKEP VAN 'N BIBLIOGRAFIE

Sodra jy **al jou bronne** in jou Zotero-biblioteek **versamel het**, kan jy begin om hulle in **Microsoft Word** (en **ander woordverwerker**) dokumente aan te haal. Hierdie is Zotero se **tweede 'wenner' eienskap**: dat dit al die vuil werk van die **stylformattering** agter die skerms doen. Jy plaas eenvoudig jou muiswyser waar jy die aanhaling wil invoeg, gaan na die "Add-ins" tab in Word en **klik die "Insert Citation" ikoon**. Dit sal 'n aanloklike teksboks met 'n rooi rand oopmaak waarbinne jy die titel/outeur van jou bron(ne) kan tik. Deur die doensleutel ENTER te druk, sal 'n **netjiese aanhaling** in jou voorkeurstyl bygevoeg word. Nog iets: daar is [meer as 6 000 style](#) wat van die Zotero-webwerf afgelaai kan word.

Baie studente sal die bang voorgevoel ken wat opduik wanneer hulle klaar is met die eintlike skryf van hulle skripsie/verslag/tesis, net om te onthou dat die bibliografie skitter deur sy afwesigheid. Dit is hier waar Zotero se **derde 'wenner' eienskap** intree: dit **hou tred** van wat jy in jou dokument **aangehaal het** en **genereer 'n volledige bibliografie**, in jou verkose styl, met die klik van 'n knoppie.

Kyk bietjie na [hierdie blad](#) vir 'n volledige gids oor die aanhaal van bronne en die generering van 'n bibliografie met Zotero.

Volgende keer - [Gevorderde wenke](#) om die meeste uit Zotero te kry.

[ARTIKEL DEUR [JOHANNES JONKER](#)]

Posted in: [Algemeen](#), [Navorsing](#) | Tagged: [Zotero](#) | With 0 comments